



## **KOMUNIKADO PA PRENSA**

*Fecha* 29 di ougùstùs 2016      *Accountmanager* Jhanirha Da Costa Gomez-Anita      *Email* [jhanirha.anita@gobiernu.cw](mailto:jhanirha.anita@gobiernu.cw)

**Pueblo tambe ke òrdu**

### **Interes hopi grandi pa formalisá okupashon ilegal di tereno**

Willemstad – Mas ku 250 habitante di e área di pariba di Kòrsou a asistí djaweps 25 di ougùstùs na Sentro di Bario Montaña, na e promé seshon di informashon ku Domeinbeheer a tene tokante di formalisashon di okupashon ilegal di tereno. Ademas di duna informashon, Domeinbeheer a duna e posibilidat tambe pa presentenan registrá nan mes e mésun anochi pa bini na remarke pa formalisashon di nan okupashon ilegal. Mas o ménos 125 persona - pues mitar di e presentenan - a hasi uso di e oportunitat aki. Di e forma aki nan a kuminsá òf kontinuá nan proseso pa sali for di ilegalidat.

Minister Suzanne Camelia-Römer huntu ku hefe Jairo Martis i hurista Ninusca Frans di Domeinbeheer a tuma tur nan tempu i a kontestá kada un di e preguntanan ku a bini dilanti. Hopi pregunta tabata mará na situashonnan individual i spesífiko ku ta rekerí un aserkamentu den un setting mas personal. Otro preguntanan tabata di índole general i tur presente a haña mihó kompreshon di e forma kon e proseduranan di Domeinbeheer ta hinká den otro.

Durante di e seshon Domeinbeheer a duna informashon detayá tokante entre otro e Maneho di Gobièrnu riba okupashon ilegal di tereno, e prosedura di formalisashon, kiko ta pasa si no hasi petishon pa formalisashon i ki ora no ta posibel pa formalisá.

Minister i Domeinbeheer a keda sumamente satisfecho ku e interes abrumador ku e bishitantenan a demonstrá. Esaki ta un muestra kla kuantu nesidat tin serka pueblo. Tambe e ta prueba ku e trayekto di Rumbo pa Ekselensia ku Domeinbeheer a inisiá pa mehorá su servisio i produktonan, ta di balor grandi pa komunidad di Kòrsou.

Minister i Domeinbeheer ta spera ku e siguiente seshonnan di informashon tambe por konta ku e mésun asistencia. Den e próksimo simannan ta tene seshonnan similar den áreanan di Bonam, St. Maria, Tera Kòrá, Barber i Piscadera. Ta anunsiá e fecha i lokalidat pa kada área despues.

**[FINAL DI KOMUNIKADO]**

---

#### **Nota pa redakshon – No pa publikashon**

*Bosero: Clifton Wallé*  
Tel. 514-0707

*Kontakto via di Domeinbeheer*  
Vinanshely Bonovasia Tel. 462-5176